



Tir Yimyim

www.tiryimyim.in

Regd. No. RNI. NAGAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tiryimyim@aolima



tir yimyim

TAPAK 7

Paris Paralympics: Yogesh Kathuniya-i silver medal angu

VOL. XXI ISSUE NO. 321 (ADOK 321) DIMAPUR SANGTENNÜ (TUESDAY)

RONGJUI (SEPTEMBER) 03, 202 ₹ 5.00

RSS-i caste census mulunga agizüker

Lotha Youth Hoho-i public rally ayongzuka agi

Thiruvananthapuram, September 2, 2024

(Agencies): BJP aser Congress tsüngda 'caste census' atema kanga atsütepa arur aser Leader of Opposition Rahul Gandhi-i iba census ajanga socio-economic aser reservation nung meputep aliba agentsü ta ashir.

Congress-i linük ajungalen caste census ka renemtsü jembia arudang Hombarnü BJP nem shisa agütsür Rashtriya Swayamsevak Sangh (RSS)-i iba atema osang jangashitsüogo.

Caste census ya kanga dang tetsüremtsü aketba onük ka lir anungji election nüboyimba atema mamshii süoki ia bilema inyaktsüla ta September 2, 2024 nü Kerala nung RSS coordination committee senden nung jembi.

RSS-isa opposition lennirtem aser BJP den toktepba political party tem dang caste census ya politics nung hadir ka ama mebensitsü metedaktsüogo.

"Temulung agütsüsü nüngdakba maparen nung sorkari caste census nüngdaker süra kecha masü saka iba ya welfare atema dang amshitsüla. Iba ya politics nung hadir ka ama mamshitsüla" ta RSS chief spokesperson Sunil Ambekar-i ashi.

RSS convention nungsa Tamil Nadu nung missionary temi tamangba yimsü melendaktsüba maparen inyakba benoka jembi.

Tamil Nadu nungi telok aikati missionary temi nisuntem tamangba yimsü melendaktsüba maparen inyakba osang angazükogo. Iba atema shisabulua bilemer. Tarutsü anogotem onoki iba onük süoki

ia jembitsü aser osang metetpelatsü" ta Ambekar-i ashi.

Tanü osangbenertemi BJP aser RSS tsüngda tesentaktep koma lir ta asüngdangdang "iba ya kibong khuret ka lir aser telong nung angatetteptsü" ta Ambekar-i langzü.

BJP-i inyaka otetsü anungji tesüiba ama RSS teyari menüngdaker ta BJP president J.P. Nadda-i ashiba atema osangbenertemi Ambekar dang iba onük metetnúa asüngdang.

"Onok indang mission ajaki meteta lir. Tanga onüktem angatetteptsü. Iba ya kibong khuret ka lir aser angatetteptsü. Yangi anogo asemnü senden amener, ajaki shilem agi aser ajak junga dang odar" ta pai ashi.

Lok Sabha elections nung BJP-i bilemba ama takok mengutetba sülen RSS-i iba osang metedaktsüogo.

Opposition aser talisa Congress lennir Rahul Gandhi-i Lok Sabha elections nung takok ngua sorkar kümra caste census inyaktsü ta nangzüka liasü.

2024 Lok Sabha elections nung BJP-i SC/ST/OBC votes mangu aser iba ya Opposition propaganda ajanga liasü ta BJP-i metedaktsüogo.

Constitution melenshitsu aser sorkar mapa nung SC/ST/OBC nem reservation shitak magütsür ta Opposition-i jembia aru. Rahul Gandhi aser INDIA bloc-i election nüboyimba nung iba onük ana ya tongti südaktsü.

BJP-i kechiba caste census meinyakteter ta Rahul-i-jembi aru aser iba ajanga BJP-i bilemba ama SC/ST/OBC nunger votes mangu ta jembi.

2021 küm alima nung gari lendong 1.19 million shi atalok ta asadangtetba nungi 330,223 ji WHO South-East Asia Region nung atalokba liasü ta WHO-i sangdong ka nung ashi.

2030 tashi nung alima nütsüng yongsük 70% shi katı urban areas nung alitsü anungji public transport kanga tenüngdakba akümtsü.

Two aser three-wheelers kanga amshiba, traffic injury data shitak maliba, tetsüng aser cycle asgi senzürtem asoshi lenmang alakta mey়gluba aser emergency services shitak maliba ajanga WHO South-East Asia Region nung gari lendong kanga ataloker ta WHO-isa metedaktsüogo.

Linüktemi trauma and emergency care systems tashi itdaktsüla, road safety data bendentsüla aser sendaktepa alirtem külemi maparen inyakba ajanga road safety tajungba akümtsü ta WHO-isa ashi.

S-E Asia nung gari lendong kanga ataloker: WHO

New Delhi, September 2 2024

(Agencies): South-East Asia Region nung gari lendong ajema kümdaktsütsü atema linüktemi mapa inyaktsüla kechiyong lanur arishi küm 15-29 aika gari lendong balala nung taküm samaogo ta World Health Organization (WHO)-i Hombarnü metedaktsüogo.

"WHO South-East Asia Region nung atalokba gari lendong balala nung asürtem rongnung tetsüng agi senzürtem, bicycle mesüra three-wheelers nung senzürtem 66% shi liasü" ta Regional Director, WHO South-East Asia Saima Wazed-i ashi.

15th World Conference on Injury Prevention and Safety Promotion (Safety 2024) nung Saima Wazed-i iba osang metedaktsü. Iba sentong ya September 2 nungi 4, 2024 tashi Taj Palace, New Delhi nung agitsü.

Tanurtem, tainlonglong, matamabensartem, tetsüng agi senzürtem asoshi bilema

lenmangtem yanglutsüla ta Saima-i ashi.

2021 küm alima nung gari lendong 1.19 million shi atalok ta asadangtetba nungi 330,223 ji WHO South-East Asia Region nung atalokba liasü ta WHO-i sangdong ka nung ashi.

2030 tashi nung alima nütsüng yongsük 70% shi katı urban areas nung alitsü anungji public transport kanga tenüngdakba akümtsü.

Two aser three-wheelers kanga amshiba, traffic injury data shitak maliba, tetsüng aser cycle asgi senzürtem asoshi lenmang alakta mey়gluba aser emergency services shitak maliba ajanga WHO South-East Asia Region nung gari lendong kanga ataloker ta WHO-isa metedaktsüogo.

Linüktemi trauma and emergency care systems tashi itdaktsüla, road safety data bendentsüla aser sendaktepa alirtem külemi maparen inyakba ajanga road safety tajungba akümtsü ta WHO-isa ashi.

Raisi mena aliba helicopter ya tzüngsang majungba agi tsükok



Dimapur, September 2, 2024

(Agencies): Yanpa Baptist Argo nung pastor Rhanlamo Kikon dak teka sangshiba aser tepsettsü merangba atma tejashi sayua Lotha Hoho kübok Lotha Youth Hoho-i September 2, 2024 nü public rally tulu ka ayonga agiogo.

Iba sentong ya Police Point, Wokha Town nung agi aser nisung aikati shilem agiogo.

August 24 nü Naukhuti Town nung NSCN/GPRN (Khango) züngsem Akhekevi-i pastor Rhanlamo amak.

Tanü sentong ajanga Lotha

nungeri pastor Rhanlamo dak inyakba mapa magizüker ta asüba sayuogo. Parnoki Wokha Deputy Commissioner ajanga Nagaland Governor dang memorandum ka yokogo.

Tanü public rally nung bangzung aika renemba nung Lotha Hoho-i lateta aliba onüktem alema tai tonglokja alisang tepuokdak nungi mechikotsü onük dena lir.

NSCN/GPRN (Khango)-i Lotha nunger kar dak danga tayang küpzükra Lotha Hoho-i parnok anema mapa inyaktsü ta

parnokisa bangjemtep.

Lotha nunger anema inyakba Naga National Group den Lotha nungeri amalitep malitsü aser NNPGs (Naga National Political Groups) ajaki iba ken o nung tai tonglokja alisang manioktsüla, anikra iba telok denji Lotha nungeri amalitep kecha malitsü ta tanü bangzung renemogo.

Lotha nungerisa "Sorkar Ka Saru Ka" tangatetba nung noktaker aser iba ya Naga nunger ajaki aginüba lir ta Lotha Youth Hoho-i ayongba public rally nungsa nenshia metedaktsüogo.

Manipur nung drone amshia bomb pokdaktsü; 1 yiru

Imphal, September 2, 2024

(Agencies): Manipur nung tensa mejungi küm alima lendong 2024 nü Senjam Chirang Maning region nung drones amshia bomb ana pokdaktsüogo.

Taonung 6.20 ako meta bomb ana pokdaktsü aser iba lendong nung arishi küm 23 tain Watham Sanatobi Devi yirua lir.

Deobarnü telungpurtemi nisung na tepsetba aser 9 yirutsüba sülen Manipur sorkari police dang Imphal West district den arrtsüa aliba tesemtem nung combing operations aser sanitization inyaktsü tetuyuba agütsüogo.

Commissioner (Home) N Ashok Kumar-i Director General of Police (DGP) dang September 1 nü prangpong aser bomb amshia amakertem aputsü atema mapa inyaktsü tetuyuba agütsü.

Commissioner (Home)-isa iba tesemnug lendong mataloktsü atema kanga junga mita anüksü tuyuogo.

Imphal West district den arrtsüa aliba tesemtem nung tensa mejungi akümba atema Keithelmanbi nungi Koutruk dena

tesem ajungalen combing operations aser sanitization mapa inyakang ta Kumar-i DGP ashi.

Kangpokpi district kübok Keithelmanbi aser Imphal West kübok Koutruk tsüngda ya kilometer 32 shi lir aser yaküm May ita nungi kin ana tsüngda rara adokba sülen iba tesem nung rayarongya arur.

September 1 nü tenemlen nungi telungpurtemi Koutruk aser Kadangband nung injang khaloktsü aser idangji nisung 2 asü aser 9 yiru ta police-i ashi.

Telungpurtemi rocket-propelled grenades aser drones amshia amak ta police-isa ashi.

"Koutruk, Imphal West amakdang telungpurtemi high-tech drones amshia RPGs pokdaktsüogo. Drones nung tapoktsü enoker sepaitem aser civilian amakba ajanga tensa tamajungba akümba sayur" ta Manipur Police-i ashi.

Iba nung highly trained professionals dena alitsü akok ta parnokisa ashi.

"Manipur nung telok

anaprongi surveillance aser telungpurtem senzüenbongba mita reprangshitsü asoshi drones amshia arur. Ajisüaka Deobarnü Koutruk nung civilians aser sepaitem amaktsü asoshi drones nung bomb enoker yokba ya inyakyim tasen ka lir" ta kettangsür kati ashi.

Deobarnü Koutruk yimtsüng nung drones ajanga bomb 5 shi yoka pokdaktsü ta police-isa ashi.

IRB meyong prangpongtem auvar ao

Hombarne 2:30 ako meta Imphal East district nung Indian Reserve Battalion (IRB) meyong service weapons auya bener ao.

Nisung kari mortar aser drones ajanga bomb yoka pokdakja Meikhang yimtsüng nung mapa lemezüka aliba 8 IRB tesep amak. Idangji parnoki ghonda 3 shi IRB bunker 3 atsünga agi aser INSAS Rifle, AK Rifle aser LMG ka auyar ao.

Iba osang angashia sepa talila yok aser parnok tsüngda khatepdang nisungtem jagi prangpong bener jena ao ta police-i ashi.

North East nung Sep 2-5 tzünglu kanga arutsü

New Delhi, September 2, 2024

(Agencies): Indian Meteorological Department (IMD)-i North East nung taruba anogo pungu tashi tsüngsang kanga majungtsü osang metedaktsüogo.

September 2 nungi 5 tashi Nagaland, Manipur, Mizoram, Arunachal Pradesh aser Tripura kübok tesem kar nung tzünglu

kanga arutsü ta IMD-i ashi.

Nagaland aser temeket nung cyclonic circulation ka aliba ajanga tsüngsang majungtsü. Iba mapang Northeast nung tzünglu kanga arutsü aser tsüngi aiba den mopung tesashi aontsü ta parnoki ashi.

IMD-isa Meghalaya, Mizoram, Maharashtra, Gujarat, Andhra Pradesh aser Telangana

nung orange alert metedaktsüogo.

Andhra Pradesh, Telangana aser Gujarat kübok district aika nung tzünglu kanga aruba ajanga tzümettsü timtem tulu ajuria lir.

Arabian Sea madak Cyclone ASNA tashimait kümogo aser taruba ghonda 6 tsüngda low-pressure area akümtsü ta Hombarne IMD-i ashi.

Mangkolemba nung mürekmejutsü indang roadshow ayongzük



Dimapur, Rongjui/Sept. 02

(TYO): Safai Apnao Bihmari Bhagao campaign nung sentong ka ama Mangkolemba Town Council ajanga August 31, 2024 nü Mangkolemba jila nung roadshow ka ayongzüka liasü.

Iba sentong nung shilem ka liasü. Iba nüburtem nem mürekmejua alitsü asoshi awareness agüja Mangkolemba Baptist Church Youth Ministry ajanga jila kubok tesem balala nung 'street play' agi shilem agia

Iba street play nungya district administration, tawa shimba Town Councillors, Gaon Buras aser Mangkolemba Baptist Church nungi lanurtemi shilem agia liasü.

Jakhama nung skill training sentong tembangogo

Dimapur, Rongjui/Sept. 02

(TYO): State-i senotsü teyari agüja Department of Employment, Skill Development, and Entrepreneurship ajanga ayongzüka "Skill Training for Rural Women through the Mobile Skill Morung" sentong phase mezüngbuba takok ngua Jakhama, Kohima nung August 31, 2024 nü tembangogo.

August 19, 2024 nü tenzükba sentong ya yimtsüng nung aliba tetsür nem par kishizüng tonga skill training agüja tashi agütsütsü nükjidong nung ayongzüka liasü.

Sentong akhumdong MLA Kevipodi Sophie-i training agirtem dang iba training nung angazükba yimya tasen amshia self-employment maongka bushitsü ayongzüka liasü.

Yimtsüng nung aliba nüburtem dentettsüsa iba ama sentong yangluba atema pai department dang pelaba lemsatepa liasü.

Chairman, Adhoc-Town Committee, Jakhama ajanga MLA Kevipodi Sophie-i sentong nung yaritepba atema pelaba lemsatep.

Joint Director, Employment, Skill Development, and Entrepreneurship, Zubemo Lotha

Tsanglao-i iba sentong nung training agirtem den pei sasa pei peria alitsü atema maongka balala indang jembi aser Village Development Boards (VDBs) dang maneni item tetsürtem yaritsü ajungshia liasü.

Kidang kibong nung kota masüba timtem aser senzüsempongtsü sadema maliba ajanga traditional skill development program tem nung shilem magitetba yimdaklir tetsür tem angateta "Mobile Skill Morung" ya ayongzüka liasü.

Pei aliba tesemtem nung training agütsüba ajanga item tetsürtem rongsenketzung

tsütsü dangar dak metaloka malitsü aser pei sasa pei peria litettsü jenjang ajungkettsür. Mezung shilem nung baking skills dak rangloker Jakhama area nungi tetsür 25 nem training agüja liasü.

Training takok ngua agir ajunga nem kulizing kaket den oven, blenders, baking tray, muffin mould, kotari, digital scale tem densema amtsük yangluba nung nüngdakba osettsüset agüja liasü. Iba sentong nung menden ya Regional Employment Officer, T. Zuthunglo Ezung liasü aser Jakhama nung aliba Catholic Church indang Catechist Koleto Richa-i sarasadem.

Iba training partner Pinnacle Skills ajanga melepziung ojembia liasü.

Iba training phase tatembangba nung yimdaklir tetsür 50 dak rangloker September 2, 2024 nü Nuiland aser Mokokchung nung tenzüker.

Nagaland Angh-i Mongmong benjong salem lemsatep

Dimapur, Rongjui/Sept. 02

(TYO): Kü adianu Sangtam nunger dangi Mongmong benjong salem abener, ta Nagaland Angh La Ganesan-i sangdong ka ajanga ashi.

Iba mapang tajung ya ajanga telungjem, tepela aser yimchiyimjung bener arutsütsü imla atar.

Asenoki alu aruba nung temoatsü aser asen sobaliba tajung benjondang asenoki telungjem aser tepela mamadokli, ta ashi.

Iba benjong anogotem temeim, tepela lidakjang aser sobaliba yimya tajung mesamadaktsü amungtsü aser asen otsüla-oboula nunger tanüla ajanga asenok kumzüka len anitsü sarasademtsür. Iba benjongmung yagi ner takum nung yimjung, tesendaktep tajung aser tatem maka temoatsü bener arutsütsü amanger aser tepela nung iba benjong amunger, ta Nagaland Angh-isa ashi.

Mokokchung nung aonsotsü ayoktsü asoshi website ka "Aonsotsü.com" ta sur lapok isa ashi.



Sb. Tzuwasanen

Mapang talangka nungi iba website ya lapoka nünurtem den yariteptsü tebilemba liasü saka Playstore nung itettsü asoshi teinyaktsü aika aliba ajanga mapang talangka agia inyaker kelenang August 17 anogo Playstore nung aiba osang tejangja aru aser iba Website ajanga nübur yaritettü maongka ngutet nung Tsümngrem nem tenungsang agütsürtä Tzüwasanen-isa lemsatep.

Iba "Aonsotsü.com" website nung tang asoshi aonsotsü 50 shi inoka lir aser meilong meilongi inoksema aotsü, iba den külemi aonsotsü, chiyungtsü aser teka agi inyaktetba osettsüset balala yokya yokshinertemi talisa ano website mamshitettetemi - 8258063722 nung tongteprateptsü akok ta Website tenz ker ajanga metedaktsü.

Kasa sentong nung Tetushi tejaoker Mokokchung Municipal Council(MMC), Chairman Wb. Imkongchuba-i mapang tatsü agia jembidang tanu putu alima kanga dang karaa aiener aser iba tensa ka nung e-commerce ajanga asenok nungtakba, sübonüba, chinüba ajak asenok ki tonga bener arutsütsü, asenok Mokokchung nunga iba den peta Website ka lapoka nübur yaritsü mapa inyakba asoshi "Aonsotsü.com" website tenzüker dang tepelaba metedakja ashi.

"Aonsotsü.com" website ya ajanga Mokokchung town aser telongtet nung bendanger Mokokchung-i arua alirtem, sorkar mapa inyaker, nubentsürtem, tantsü r tamburtem aser nüngtakbarum nung parnok mazüngi aliba mapang aser shishi meotetba mapang nung aonsotsü aser chiyungtsü balala ki tonga bener otsütsü aser yariteptsü tangatetba nung lapokba lir ta "Aonsotsü.com" website lapoksang Tzüwasanen-i ashi.

Mapang tatsüka asoshi Mokokchung nung aliba ward 18 nung dang inyaka alitsü aser ano mapang apir iba website ajanga Dimapur aser Kohima nung inyaktsü tebilemba lir, iba den külemi Mokokchung Municipal Council ajanga laletja aliba meraksatsüi talirtem den yokya yokshitsü tebilemba lirta Tzüwasanen-i metedaktsü.

Mokokchung Municipal Council, Chairman-isa iba website ajanga shishilembaba maparen inyakba nung MMC teyari nüngtakra akokba lenmang ajak MMC-I yariteptsüta metedaktsü.

Iba "Aonsotsü.com" website asoshi Tsüngrem teyai meshia aser sentong nung Tsüngrem lenisüba jazüka MTBA Asso.Pastor Wb. Yanglo Pongen-i sarasadem aser Dr. Obendangla ketcangsüba nung iba sentong agiba den telok külemi sarasadema tembang.

Tsuru Restaurant Pre-Launch sentong agi



Lok Sabha MP, S. Supongmeren Jamir-i Tsuru Restaurant lapoksuba noksa nung angur.

Dimapur, Rongjui/Sept. 02

(TYO): DDSC Stadium, Lahorijan anasa Zakiesato nung aliba Tsuru Restaurant nung 'exclusive pre-launch' sentong ka September 2, 2024 nü ayongzüka liasü.

Iba sentong nung Nagaland nungi MP (Lok Sabha) S. Supongmeren Jamir tongti tesemdanger liasü aser DABA

Town Fellowship nungi Associate Pastor Rev. Wati Kichu-i sentong meshiteta sarasademja liasü.

Tsuru ya Dimapur yimti tiyong nung amenoka lir, kong Japanese cuisine angutsü. Iba

restaurant nung Japanese décor inoka lir aser nüburtemi sushi, sashimi aser ramen ama Japan aser Norway nungi indang-

indanga bener aruba chiyongtsütem chittettsü.

Iba restaurant kibur Imnajungla Jamir ya küm 12 tashi Japanese cuisine amshia aru aser bendang lima nung Japanese chefs tem den küm aika kulemi inyaka arua liasü.

Lai Tsuru indang mangdang lemsatepdang, "Ozü nübur nem Japan nunger chiyongtsü aser sobaliba tali tajungba metedaktsünuba yong yangi Dimapur nung Japanese restaurant ya lapoktsü mulungtet," ta ashi.

Iba restaurant nung sorochioker tekolak ya Chef Ashihe lir, shiba Qatar, Maldives, Jordan aser Saudi Arabia amala linüktem nung Japanese cuisine nung takotet nisung ka lir.

Tsuru ya nüburtem asoshi kobi melie lapoktsütsü, kong Japan nunger sobaliba den moyoktepa chiyongtsü tajungtiba agütsütsü.

Tsuru Restaurant ya Zakiesato, Golaghat Rd, near DDSC Stadium, Lahorijan, Dimapur nung lir.



September 02, 2024 nü New Delhi nung Congress Tir, Mallikarjun Kharge leniba nung Jammu & Kashmir assembly election atema Central Executive Committee senden amendang tangokba noksa nung angur.

Union Cabinet-i aluyimba sector atema sen crore 14,000 lemzüktsü

New Delhi, Rongjui/ September 02 (Agencies): Linük nung aluyimba sector ajungkettsü, nükjidong nung Hombarnü Union Cabinet-i mapatong balala atema sen crore 14,000 lemzüktsü, ta ketcangsertemi metedaktsü.

Digital aluyimba, chiyungtsü security, shisaliok aser sustainable farming nung rangloker Centre sorkari kanga tongtibang project tenet agizükogo.

Kanga tongtibang project kaji Digital Agriculture Mission lir aser iba project atema sen

crore 2,817 lemzüktsü. Iba mapatong kubok technology amshiba ajanga aluyimba sector ajungkettsü, ta ketcangsertemi metedaktsü.

Union Cabinet-is Crop Science for Food & Nutritional Security atema sen crore 3,979 lemzüktsü. Iba mapatong kubok chiyungtsü tajungba adokdaktsü atema aluyimba tsütsü research aser terenlok ajungkettsü.

Iba dak alia Cabinet-i aluyimbaren shisaliok atema sen crore 2,291 lemzüktsü.

Ano kiset shiruru health tajungba akümtsü aser azükarutsü atema sorkari Sustainable Livestock Health & Production atema sen crore 1,702 lemzüktsü aser horticulture terenlok atema sen crore 860 lemzüktsü.

Sorkarisa sen crore 1,202 Krishi Vigyan Kendras (KVKs) atema lemzüktsü. Iba ya ajanga aluyimberem nem aluyimba technologies agütsütsü.

Sorkarisa natural resource management atema sen crore 1,115 lemzüktsü.

ED-i ochimashi ken o nung AAP MLA, Amanatullah Khan puogo

New Delhi, Rongjui/ September 02 (Agencies): Delhi Waqf Board dak sendakba senotsü ochimashi ken o ka nung Hombarnü Enforcement Directorate (ED)-i Aam Aadmi Party MLA, Amanatullah Khan puogo.

Hombarnep ED ketcangsertemi Okhla nung Khan' er ki mita reprangba sülen pa dang ghonda trok asüngdangyaa liasü.

Hombarnep AAP lenir Amanatullah Khan-i X ajanga, pa aputsü atema ED ketcangsertem par kidangi arua lir, ta metedakja liasü.

Khan-i, "Tang ya anepdang 7:00 ako lir aser ni aputsü atema

ED ketcangsertem ozü ki tonga arua lir. Kü kinüngtsü tetsü cancer agi shiranger aser anogo pezu tejaklen ang surgery agia liasü; la-a ozü kidang lir. Ni parnok dangi shidi züluogo aser parnoki agütsüba notice ajak atema telangzüba agüja aruogo. Ni aputsü aser onok mapa nung tetsükdaktsü agütsütsü nükjidong nung parnok arua lir," ta metedakja liasü.

Taküm April ita nung Rouse Avenue Court-i ED-i agütsüba ken o dak sendakba nung Khan nem bail agüja liasü.

Tawa ED-i, parnoki jaokba ama Khan-i parnok matsüngdangi marur aser Delhi Waqf Board nung contractual employee 32 shim, ta tai

bushisüngdangba nung pai onok den amalitep masür, ta metedakja liasü.

ED indang lawyer-i, Khan anema bushisüngdangba maparen parnoki metembangteter, kechiyong pai ED matsüngdangi marur, ta metedaktsü.

Tang tashi nung tai tonglokja alir nisung pezu aser company ka anema ken o benokogo. Sen crore 100 shi jenjang Waqf kiojentem ozüng alema 'lease' nung agütsü ta tai tonglokja li.

Iba dak alia Khan Chairman inyakba mapang nung Delhi Waqf Board nung contractual employee 32 shim, ta tai

tonglokja li.

Maharashtra nung BJP MLA Nitesh Rane anema ken o benok

Mumbai, September 02 (Agencies): BJP lenir aser Maharashtra nung MLA, Nitesh Rane-i Muslim nungerem amokmerena jembiba atema pa anema ken o benoka lir.

September 1, 2024 nü Rane-i Srirampur aser Topkhana na nung lokti senden ana nung Hindu lenir Mahant Ramgiri Maharaj pusema jembiba liasü.

August 14 nü Nashik district nung yimsü dak sendakba sentong nung nung Maharaj-ia Islam aser ainkar Muhammad anema jembiba liasü.

September 1 nü sentong ana nung jembidang Rane-i, Hindu lenir Mahant Ramgiri anema inyakra onoki mangyangtsü, ta jembiba liasü.

"Nenoki Ramgiri Maharaj anema inyakra onoki nenok

tekülem (mosque) kidangi aitba sülen nenok tepsettsü," ta BJP MLA-i ashi.

Ahmednagar police-i Rane anema FIR ana benokogo. BJP MLA-i Ahmednagar nung Sakal Hindu Samaj longkak aitba sentong nung shilem agia o jembiba liasü, ta police-i ashi.

BJP MLA Rane-i, "Yashi ni Ahilyanagar (Ahmednagar) aser Srirampur na nung liasü. Yangji onoki Mahant Ramgiri Maharaj pusema jembiba. Pai jembiba o nungji tasen kecha mali," ta ashi.

Taküm April ita nunga Rane anema ken o pezu benoka liasü. Mumbai kubok Mira Road nung lokti ana tsüngda rara adokba sülen Rane-i Muslim nungerem amokmerena jembiba liasü.



September 02, 2024 nü Srinagar nung Peoples Democratic Party (PDP) nungi candidate, Zuhai Yousuf Mir-i Lal Chowk constituency nungi tokteptsü atema nomination file asüdang party pusemertem kima adenshia aliba noksa nung angur.

AP aser Telangana nung tzünglu dak sendakba lendong nung nisung 19 asü

New Delhi, September 02 (Agencies): Andhra Pradesh aser Telangana na nung tesem aika nung tzünglu maneni aruba ajanga tzümettsüng aser tzünglu dak sendakba lendong balala

nisung 276,000 dak tema kongshiogo. National Disaster Response Force (NDRF) team 26-i state anaprongla nung tzümettsüng agi kongshiba nübertem yaridar.

Hyderabad nunga aonung piyong tzünglu aruba sülen tesem aika nung tzü metsüngba ajanga September 2 nü Hyderabad district nung school ajak sodi sangdonga liasü.

Vijayawada nung rong amshia tzümettsüng agi kongshibapurtem nem chiyungtsü den teyari balala lema agütsüdar.

Tzümettsüng ajanga Andhra Pradesh-Telangana arrtsü nung kanga tongtibang apu ka raksaba ajanga state ana national highway tesendaktep lenmang raksago.

Khammam nungbo sorkari agütsüba teyari agi nüber ket matonger, aser nisung aika building nung jenoker tzü ajema akümtsü atatepdar saka tzümettsüng tensa tamajungba dang akümer.

Budameru Vagu ayong densema ayong aika nung tzü tali mobanga yimdar. Budameru Vagu ayong anasa alirtem aika aienshidakja relief camps nung jenoka lir.

Indian Meteorological Department (IMD)-i September 2 nungi September 5 tashi Andhra Pradesh tesem aika nung tzünglu kanga arutsü, ta metedaktsü.



September 02, 2024 nü Patna nung Rashtriya Janta Dal Farmers Cell nungi züngsemtemi longkak aita Raj Bhavan-i aodang police-i nokdanga aliba noksa nung angur.



TIR YIMYIM

YIMOBILEM (EDITORIAL)

DIMAPUR SANGTENNÜ, SEPTEMBER (RONGJUI) 03, 2024

Tuensang nung asayadak

Nagaland nung kümteta aliba district-tem rongnung football asayatepba Inter District football tournament koba dang Dr. T.Ao football Trophy ta ajar, iba asayamong tang agi 23 buba Tuensang town nung asayatsü atema 'astro turf ground' renema akaba ngur tasayanütsüka jangratema repranger. Astro Turf tetezü ai taila (artificial grass surface) agi asayadak tesem nembunga yangluba dang ajar, anungji astro turf agi meyibanga yangluba asayadak ground tema ajakki ai shitakba agi meyibanga aliba angur aser iba tema nungji asayartema yiruyiponga masü aser anak auyia memezü jangratema asayar. Ibayongji, tanübo alima nung ball amshia moapu nung asayaba asaya ajak astro turf ground nung dang asayaba angur. Atangji, asenokia astro turf masüyonga shitakba aia meyidakja asayadak anepalutettsü, saka aji mapa temela masü aser aiji tasüa asür, anungji sen jenjang asakyonga astro turf alembajisa tajungba aser tanü putu tensa agia aji akanger. Aji oda, Mokokchung district nunga asangurtem kari danga pei pei zünga tenteta ayangi orr pei pei alidak astro turf ground tilala kaka dang yanglutet nungbo aji agia tanü asüng tanurtem asayatsü nung jangradaktsüla ta bilemer. Kasaji, Dimapur nunga astro turf malemyonga, state stadium putu junga merenemet menendoker aliba ya danga renemtsür nashitemi achiba rem ama meyiba ai tapu ka to danga meyidaktsü asübo Dimapur nung alir tanurtemibo astro turf dangbo iba ai manungjiang jangra tatemba pongshishia asayala. Atangji, tangar koka asayatetsübajibo kechi koma ground ka nung asayar ta masü saka koma asayar ta asüba dak tuluba keta lir, anungji auyi ponga aser lishi melanga asayaba ground nung asaya intettertemjiang temang teküprakba aser tekaraba aser tangar astro turf ground nung asayartem dang nungi maniba aser tajungba asayatetsüa akok. Football asaya ya balaka anükalemer asayaba asaya ka masü, ibaibo temeranger aser pei temang tashi agi nungpoka oa asayatsüba asaya ka lir. Iba jagi football asayatsüba yabo nisung tara, asoajen tulu aser talang aser timtem arema asemtetba nisungang nüngdaker. Iba jagi balaka asenoki football asayatsü kanga jangraaka aser tasayaa junga asayatetaka tangar koka among adena oa masayatetter südi ta bilemer. Atangji, koba asaya südir süaka tangar den toktepa asayatsübajiang masü saka asenok o asenok na ta, tang Dr.T.Ao Trophy asayamong amaji mapang mapang shia tesem balala nung asena asen yari ayongzüka asayaba ya kanga junger. Iba amai asena asen yari nung temulung agüja ajungshitepa asaya nung dang tarutsü nung asen lanurtem rongnungi Dr.T.Ao tanabuba aser tasembuba ta adoka asen lima nem tenüng tajung bener arutsütsü. Aji oda, Kohima dak alaka Dimapur aser Mokokchung nunga astro turf ground kata mali ser lishi melanga aser auyi ponga akhi taoba alima aso 19 aser 20 buba nung asayaba kasa ground nung tosa asayaa lia, Tuensang nung astro turf ground yanglur asayatsü jaokbajie asenok ajak asoshi tepelatsü tayongzükba osang tuluka asütsü. Aji oda, joko asayadak tajungba kümä astro turf ground yangluba amaji asaya nunga World cup nung astro turf ground nung asayartem den meneptepa asayatsübajie Naga nunger asayartem ajak asoshi tayongzükba tuluka kümogo. Ground-bo astro turf saka asayaba nungbo ano kecha balaka tajungba maküm ta süra kechabo memetet ser süoshi tasen semer necktie agi amai asütsü. Ibajie temulung nung yur, tang nungi danga tesem ajak nung astro turf ground yanglur, tetsür aser tebur chanutem anidena football dang masü saka asaya tapu ajak nung tejangraba adokdakja asayadaktsü tenzüktsübajie asenok state nung lenirtem aser tantsü tambu mapa asütsüla. Kohima nung astro turf ground nung asayabajia balaka saka ano oagi Naga lima anüdoklen Tuensang nung oagi asayatsüba astro turf groundjissa tajungba aser jangratemba asütsü amai bilema, Dr. T.Ao football asayamong 23 buba reprangtsü yongyaa atar.

OLEMSABANG

NAGALAND LIQUOR TOTAL PROHIBITION ACT, 1989: (AROGO TAKOK ASER TAMAKOK)

~ A.M.TOSHI JAMIR

The NLTP ACT,1989 ya Nagaland Legislative Assembly nung renemer külen Governor-i 13.04.1990 anogo nung mulunga agizüker meyongnem agütsü.Iba sülen 24.04.1990 anogo nung Nagaland Gazette extraordinary paper nung menünga (published) adok. Anungji 24.04.1990 anogo nungi Ozüng aküm.

Yi tongpang ya Arago-i tenzük aser joko iba Act-ya yanglur kelen küm 35 (semerser pungu-shi) abensar.Anungji Nagaland nungbo Arago den masüngdangtep (without consulting the Churches) iba ya tera melenshitsü mesura ajak agiena endoktsü-ji tera asaksü amai repranger.

22.08.2024 anogo nung iba Ozüng ya Nagaland State Cabinet-i reprangshi (re-visited/reviewed) aser tera agentsü (to relax) atema jembi. Iba sülenji, 27-29th August 2024, Kohima nung 5th Session of the 14th Nagaland Legislative Assembly amendang iba onük ya benoka jembi, saka Sarkar tebilemba matalok. Arago den, jilia tebilemba masüngdangtep (without having consultation with Church in advance) inyakba agi südi ta bilemer.NLTP Act ya kodanga memelenshitsu ta mebilemtsula. Tang aliba Act nungya tebilemba tajung khar enoksemtsula lira/tamajung khar endoktsula lira, aser ibaji ajurutepa jembir kulen Sarkar-i mulungra, dang aliba Act ya melenshitsu asoshi lenmang sadema lapoka lir.

NLTP Act,1989 (in operation from 24.04.1990) ya takok ngua aotsü asoshi Arago teyari nungdak ta Sarkar/State Government-i kanga junga meteta liasü. Anungji iba Act yangludang Chapter III Section 27, clause (1) aser (2)-ji enoksem ,kong STATE PROHIBITION COUNCIL (State level nung) aser District shia nung DISTRICT PROHIBITION COMMITTEE tenteta (constitute/form) mapatem inyaktsü shia lir.Yi tongpang (nokdangba) wadang-ya takok ngua inyaka aoba nung State Government yaritsü asoshi item Council aser Committee-ya tentet.

Excise Department nung sepoy-tem (Excise personnel) 336 lir ta Osang-kaket nung adokogo (nungdakba dang nungi agi ishimba ta ashir). Excise Department-i inyakba tongtipang mapa rongnung anaji itemi :(i) NLTP Act 1989 / Yi Nokdangtsu; (ii).NDPS Act 1985 (NARCOTIC DRUGS AND PSYCHOTROPIC SUBSTANCES ACT,1985).To prohibit:production manufacture,cultivation, possession, transport, storage and consumption of Drugs or Psychotropic Substance. Shibai metet, STATE PROHIBITION COUNCIL ji tang-dang nungi tashi taitba inyaka ali asunungbo Excise Directorate kupok Sepoy-ji teimba kumer lila ta bilemer.

Iba NLTP Ozüng ya joko kum 35 tain (old).Sürapangla, iba Kaket ya Arago-tem/Mungdang-tem kwi ka ket nung yua lir? Arago-tem/Mungdang-tem nung talisa Tekolaktem kwikati iba kaket ya züngdanger ,aser study sudanger? Yi tongpang ya takok ngua aor asü maor kwiben Sarkar-i/Arogo-i asadanger(how many times Govt/Church has reviewed/evaluated the Act through Debates/Seminars (etc) ?

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeri angateta agitsü mepishir

Ohio State University campus nung tanel a sentensi sentong agi



Ohio State University campus nung revival sentong agidang tangokba noksa nung angur.

September 02, 2024: Taoba

hopta Ohio State University campus nung tanel a sentensi sentong ka agiba sülen kaketshir aika baptiogo.

Iba sentong nungji Buckeye football asayar kari taküm kuli lemsatepa liasü.

Amongnū Ohio State University indang Curl Market nung campus Christian student group balalai senteper iba sentongji ayongzuka liasü.

Asentensi sentong tembangba sülen nikongdang kaketshir 60 shi baptiogo, ta OSU students newspaper, The Lantern-i metedaktsü.

Iba sentong nung o jembirtem rongnung Emeka Egbuka, TreVeyon Henderson, J.T. Tuimoloau aser taoba mapang saisaponger, Kamryn Babb nunger liasü.

Iba sentong nung nisung

2,000 jungnúa aden.

University nung tesayur kati, a sentensi sentong nungji saisapongertem pei temelungjang taroktiba nungji Tsüngrem dak tamang katetba taküm kuli lemsatepa liasü, ta ashi.

"Sentong ajakji Yisu dak rangloker agiba liasü," ta paisa ashi.

Saisapongertem taküm kuli lemsatepa sülen baptitsü melungertem ali asü? ta asüngdangba mapang nung aikati telemtetba agi, iba sülen nisung 60 shi baptitsüogo.

"Baptitsü atema nisung ka sülen ka, ta aru. Tanel a temeshi ajanga mapa inyaka liasü. Ni yamai kodanga majangshidang," ta paisa lemsatep.

Staff züngsem kati, "Parnok baptitsü jakdang onoki Khrista osangtajung lemsatepa liasü

aser baptiba indang jungjunga angatdaktsü. Iba sülen onoki parnok takdang kati anir aoba sülen Yisu nütsüng ka koma alitsü, ibaji lemsatep," ta metedaktsü.

Sentong ajak tembangba sülen interview ka nung jembidang Babb-i, iba sentong nung adentsü atema nisung aika adenshibaji 'ajaki teimla bushiba agi lir' ta ashi.

"Meimchirtemi teimla nüngdaker, aser iba teimlaji Yisu Khrista dak dang angutsü," ta paisa ashi.

"Kü Kibur aser kü Kümtetdkbai mapa inyakba kulisü angubaji ni asoshi maongka liasü. Item ajakji Pa sentsüwangshi atema liasü. Iba ya football team ka indang masü saka Yisu Khrista aser iba linük, America atema liasü," ta paisa shisem.

ANOGO ABEN TSÜNGREM DEN

Halleluyah

Nenoki kibuba sangang (T.Ken 146:1)

Halleluya Oji "Nenok Kibuba sangang" ta meyip. Iba O ya Tenüngsang Ken nung metsür pezüben amshiba angutsü aser Jungkai Adokba tapu ter tuku nung pezüben angutsü, meyokteper metsür tiben amshiba angutsü. Tenüngsang Ken nungji alima Halleluyah aser Jungkai Adokba nung amshibaji kotak Halleluyah lir. Ibai tanga o ajanga tanga oshi nung meyipzüksü makok. Ibai Greek, Latin, German, French, Italian, Dutch aser English ajak nung kasa amshir. Kin ajaki kotaker ken nung Halleluyah amshir.

Yimya Halleluyah : Tenüngsang Ken 104ji iba o yagi atenba angutsü. Iba ken yimya tebur ajungba sangro ka lir. Ibai temoatsüba Tsüngrem dangi tanel a jaba agi tenzük aser Tsüngrem uluba, Pa tamaren indang yimya bushiba nung yimsü mulungjang atenba shisatsü nung jembir. Tesangwaji Tsüngrem sobutsü. Pai süki ama anüngtem atsülanga toktsür aser tzüyim kimongji Pai yanglu. Mepettemi Pa talungtsü aser mopung tashikang nung amener. Tsüngmokji pa ola. Pai ayongnutemji yanglu koba agi ozü aser arem shiruru nem tzü agütsür. Remji nashi telok asoshi, süngdongtemji ozütem tesep yanglutsü asoshi, tenemtemji arem napongtem asoshi, lungtemji shisen jenokdak asoshi Pai yanglu. Item yagi Pa temeim aser shisatsü indang sayur. Pai ita aser anü asoshi ozüng yanglu. Anü adoker aser anü tesangwa nisungtem pei mapai aor aser nikongtsütsü tashi mapa inyaker. Ammangi anisüngzük agütsür.

Idangi ken züleri tzüyim dangi meyip kong oset jenti lir aser tzüma nung rongtem senzür aser telung nung shiruru tulu asayar. Tsüngremi itemji taküm lidaktsür . Yimya bushiba lagi ken züller mulung Tsüngrem tenüng asangba agi sünga kümdaktsü. Pai ashi, "Pa asoshi kü teshisadangba tanang asütsü. Ni Kibuba nung pelatsü." Kaket anaji memesüktepi mali. Tsüngremi aji asenok asoshi zülu, yimya kaket aser Jungkai Adokba kaket. Anaprongla nung Tsüngremi Pa sasa jungkai adok.

Yimyaren alir shirnoki Tsüngrem mapa nung Pa mangur parnoki parnok sasa tenük poker alir aser angutsü nungtemer. Tsüngrem dak mamangertem parnok sasa nükpok shimertem lir. Alima nung, tzüyim nung aser anüng nung kechisarena agi Tsüngrem jungkai adoktsü.

Intl' Space Station nung astronaut temi tekülem sentong nung adener

September 02, 2024: Tang iba mission atema renema lir, International Space Station (ISS) nung aliba NASA astronaut anati online ajanga liasü.

Texas nung aliba par Argo tekülem sentongtem aser sarasadem sentongtem nung adener.

Astronaut ana- Barry Wilmore aser Tracy Dyson naprongla ya Pasadena nung aliba Providence Baptist Church nung züngsemtem lir.

Arogoi ashiba agi, astronaut ana jagi Argo züngsemtem danga online ajanga International Space Station-a sayua liasü.

Arogo nung züngsem, Barry Wilmore-i anogo 8 nü mission atema International Space Station-i atu, ajisüaka parnok indang Boeing Starliner capsule nung technical timtem kar adokba ajanga mission ji ita 8 tashi atsülangogo.

Arogo nung pastor, Tommy Dahn-i, mission atsülangyonga Wilmore indang tamang jenjang ajanga tashi itdaktsür aser pai mapang shia Argo den tongteprateper, ta metedaktsü.

June ita nung ISS-i atutsü jakdang Wilmore-i, ozü kibongi teperi," ta ashi.

Pastor kati COVID fund nungi sen million 3.5 ochimeshii amshi



Pastor Rudolph E. Brooks

September 02, 2024: Cheltenham, Maryland nungi pastor kati senotsü nung ochimeshii atema ita 18 tepuokdak ayutsü obendang agütsü.

Arrshi küm 48, pastor Rudolph Brooks-i COVID-19 Paycheck Protection Program (PPP) nungi dollar sen million 3.5 agiba sülen pai Tesla gari ka densema kiojen balala alia liasü.

Washington D.C nung aliba Kingdom Tabernacle of Restoration Ministries tentetsang aser pastor, Brooks-i 2020 küm April ita nungi 2021 küm September ita tashi nung loan agütsü asoshi taila documents aika agüja COVID-19 Paycheck Protection Program indang senotsü ochimeshii amshiba putet, ta District of Maryland nung US

Attorney, Erek L. Barron-i metedaktsü.

Brooks-i senotsüji pa indang business Cars Direct, Kingdom Tabernacle of Restoration Ministries aser Madaro, LLC nung amshi. Pai PPP loan application nungji pa kübok inyakertem tenüng tali agütsüba den külemi sen teindokba aika metedakja liasü. Loan anguba sülen pai pa nije atema sen ajakji ochimeshii amshi.

Pastor Brooks-i 2018 Tesla Model 3 gari ka ali, Upper Marlboro, Maryland nung kiojen ka ali aser tanga nüngdak balala nung sen aika indoka liasü.

CARES Act ozüng kübok Brooks-i ozüng alema inyak. Coronavirus wara agi kongshir America nunger tem nem emergency senotsü teyari

agütsütsü atema 2020 küm March ita nung CARES Act ya benoka liasü.

Court matsüngdang pastor Brooks-ia pai aibelenba nangzük, iba sülen taoba Mongolbarnü pa anema obendang agüja liasü.

FBI aser IRS densema federal ageincy aikati Brooks anema ken o benoka liasü.

2018 küm interview ka nung jembidang Brooks-i, pa arrshi küm 4-5 asüdang Tsüngremi pa ajaba pai meteta liasü aser tebu-a Argo nung minister ka liasü, ta metedakja liasü.

Par Argo indang website nung, pastor Brooks ya Tsüngrem melungjang bushiba nisung ka aser Tsüngrem nüburtem meimba nisung ka, ta shia lir.

AO OSHI ANGAZÜKDAK:**TANÜ ANGAZÜKTSÜBA OJANG****Tamayongtsü**

(n) súngó den achi-ajemba (snack, side dish)

* Tanü senden nung tamayongtsü peria agütsü.

Tamba

(n) kamdong, tamdak, tayi (handle)

* Súngó muluba chipo tumba kanga junga enoktsüla.

OLONG PAITEP # 6913

1					2			3
							4	
5		6			7			
8								9
							10	
					11	12		
14					15			
					16			

TIPLÉN

TIPLÉN	LANGTSÜNGLEN
1. O jembitsü tashi	- 8
5. Súngjang tapu ka	- 5
7. Tekanük nung enokba	- 5
8. Teka amtep	- 5
12. Tzük asendak	- 5
14. Tsüngpang tema aliba	- 5
15. Ken atenba yimya	- 5
16. Asangur	- 8
1. Tepok telung nung shilem ka	- 7
2. Tamajung aküm	- 5
3. Chi den külemi achiba	- 3
4. Meimchir alimai aruba	- 3
6. Laishiba nung ayong ka	- 4
9. Tarutsü nükla	- 7
10. Tamendakdak/Nükjidong	- 4
11. Tenük-telen mejungi aküm	- 5
13. Terok nungi adokba	- 3
14. Meimchir telesma	- 3

OLONG PAITEP # 6912 TELANGZÜBA**TIPLÉN :**

TIPLÉN :	LANGTSÜNGLEN :
1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioksü, 17. Itsük, 18. Kar.	1. Tai, 2. Asensor, 3. Tanü, 4. Kua, 5. Mitsüksü, 6. Azübensi, 8. Lah, 9. Jangkok, 12. Akok, 14. Nashi, 16. Sür.

NAI-A YA METETTER MA

Romania nung class 12 nung azünger Bianca Maria Oana-i "World's Youngest Certified Female Paramedic" naroküm ngutetogo. Bianca ya National College of Saint Sava, Bucharest nung azünger aser Targu Mures nung Natural Sciences nung paramedic course graduate asü ta World Record Academy ajanga metedaktsüogo.

Rs 30 crore alang Yaba súngjang apu

Guwahati, September 1, 2024 (Agencies): Deobarnü Assam Police-i Karimganj district nung mozü shibeleren nisung 3 apu aser parnok ket nung Yaba súngjang aika bema aliba ngutetogo.

Osang tejangja ka angazükba sülen National Highway 6, Badarpur nung gari ka mita reprangdang Rs 30 crore alang Yaba súngjang bema aliba angu.

Iba gari nung nisung asem-Ashraf Ali, Abdul Hannan aser Pradeep Das nunger mena aliba apu aser parnok ajak ya Cachar district kubok Katigorah nung alir. Par asemi Assam kubok Patharkandi ajanga Mizoram-i Yaba súngjang bener aotsü merangdang apu.

Par asem Badarpur Police Station nung yua lir aser police-i maneni bushisüngdang südar.

Assam nung tesayur 23,956 nem appointment letters agütsü

Guwahati, September 2, 2024 (Agencies): Assam sorkari

September 2 nü contractual tesayur 23,956 nem appointment letters agütsüogo aser iba ya education system tajungba kumdaiksütsü nükjidong nung lir.

Samagra Shiksha, Assam kubok upper aser lower primary schools nung contractual aser state pool tesayurtem nem Chief

Minister Himanta Biswa Sarma-i

appointment letters agütsü.

Iba sentong nung tetushi süa jaokerji Education Minister Ranoj Pegu liasü.

"Sorkar mapa lakh 1 agütsütsü nangzükba tongogo.

Assam nung May 2025 tashi nung mapa tasen 50,000 adoktsü aser itemji züngsema mapa lakh 2 agütsütsü" ta CM Sarma-i ashi.

"CM Himanta Biswa Sarma lenisüba kubok Assam sorkari iba

mapa inyakba ajanga transparency & merit-based recruitment nangzükshir aser

sorkar mapa lakh 1 agütsütsü nangzükba alizüng atonger. Iba

nung BTC aser Karbi Anglong Autonomous Council dena lir" ta Chief Minister's office-ia metedaktsü.

Air India Express-i tayimtsü tasen 5 tenzüker

Guwahati, September 2, 2024 (Agencies): Air India Express-i

46th domestic destination ama Agartala tashi senzütsü tenzükogo. Parnokisa routes tasen pungu nung tayimtsü senzütsü tenzük aser iba ajanga passengers ayongayonga senzüsenbongtsü.

Deobarnü Air India Express-i Agartala & Guwahati, Agartala & Kolkata, Hyderabad & Guwahati,

Bengaluru & Vijayawada aser Bengaluru & Indore tsüngda daily direct flights tenzükogo.

Agartala züngsema Air India Express-i tang Delhi nung weekly flights 14 tashi senzür. Iba nung Guwahati, Kolkata, Bhubaneswar, Bengaluru, Chennai, Delhi, Hyderabad, Imphal, Jaipur aser Kochi dena lir.

Guwahati nung connectivity kanga renlokogo aser Air India

Express ajanga weekly flights 77 tashi senzür. Guwahati nungi tesem 8 tashi tayimtsü indanga

senzür aser stop connections 1, domestic destinations 20 aser international destinations 4 lir.

Air India Express' network nung Indore aser Vijayawada züngsemogo aser yimti ana nungi Bengaluru, Hyderabad, Sharjah aser tanga yimtitemi tayimtsü senzür.

Manipur Home Department-i külen tsütsü shir inyaker: CoTU

Imphal, September 2, 2024 (Agencies): Manipur Home Department-i tejak repranga maparen inyaker ta Committee on Tribal Unity (CoTU)-i aitsüogo..

Tawa Koutruk nung Meitei telungpurtem aser parnok den sendaka alirtemi Kuki-Zo civilians amak saka sorkari iba tatalokba nung temulung magütsür ta CoTU-i ashi.

Arambai Tenggol amala Meitei teloktemi drones, bombs aser military-grade mortars ama

advanced weaponry amshir saka kettangsürtemi mangu ama dang yutsür ta CoTU-i ashi.

Social media nung belenshiba audio recording ka nung Chief Minister N. Biren Singh-i telungpurtemi advanced weaponry amshiba shia lir saka state kettangsürtemi iba anema mapa meinyaker ta parnokisa metedaktsü.

"Home Department-i combined operations asütsü tuyuba anema Kuki-Zo nunger ya noktaktsü kechiyong state sorkari külen tsütsü dang shir mapa inyaker. Maneni media outlets-i osang tai meprokshitsü atema kuli jangjaba sülen ang osang adoktsü ayongzüker" ta CoTU-isa metedaktsü.

TENÜNGSANG AGÜTSÜR

Obula Imtajembar Semchir ajak tenüng nung tepele lemsateper.

Wb. Kimstsüng Longchari aser Wt. Noksangnaro Amlari jabaso Sp. Loktimen, tang tawa NPSC-i kettangsüa agiba nung Secretariat Assistant (S.A) Personal & Administrative Department, nung 2nd rank jenjang ngutetta ozü Imtajemba Semchir ajak nem konang nüng sang tulu bener arutsüba asoshi kanga dang pelaba lemsateper.

Tsüngremi ne taküm alima wadang tenzükba nung anema aliba aser shisatsü moajangma ta semchir ajak tenüng nung sarasademtsür.

*Semchir Ajak Tenüng nung Tambusang
Sd/- LOLENYANG LONGCHARI
Satsükba Mokokchung*

Israel nung nisung meyirijang aika adenshia longkak aiter

Jerusalem, Rongjui/Sept. 02
(Agencies): Gaza nung pua alir nisung trok asüba sülen Deobarnü Israel nung nisung meyirijang aika longkak aita liasü, kechiaser linük indang lenirtemi pua alirtem chioctsü atema ceasefire tezungzüktep magiteter.

Tel Aviv nung nisung 300,000 adenshi aser linük tesem balala nung longkak aitba nung 200,000 dak temai shilem agia Ato Kilonser Benjamin Netanyahu dang tanüngba pua alir nisung 101 chioctsü asoshi tezungzüktep agiang ta takhangba agütsür, ta Israel media ajanga ashi. Jerusalem nung longkak aiter temi yimdon nokdanga ato kilonser aliba kima longkak aita liasü.

Video footage nunga Tel Aviv nung highway tongtiba süng longkak aiter adenshia nisan aser pua bener oa tepster indang noksa bener liasü. Police temi longkak aiter dak water canons nungi tzü khaloktsüba video tem nung nguogo. Iba mapang nisung 29 puogo ta ashir. Israel indang labour lenirtemi Hombarnü nübur ajunga dang longkak aittsu ayongzüka liasü.

Deobarnü Israel mitkar temi Gaza south tsütsü Rafah yimti nung longpok ka nungi nisung tasümg ngutetba sangdonga liasü. Pua bener aor Carmel Gat, Hersh Goldberg-Polin, Eden Yerushalmi, Alexander Lobanov, Almog Sarusi and Ori Danino nunger tasümg ya Israel-i meyiba bener ogo, ta mitkar indang odongtar Rear Admiral Daniel Hagari-i osangbener dang ashi.

Forensic examination agiba nung parnok ya Hamas kiralongrar temi ghonda 48-72 tsüngta anasatepa nungi khaset ta jangjatet, ta Israel health ministry indang odongtar kati ashi.

Netanyahu, shiba dang ita 11 jungnua raraba tembanga ceasefire alitsü aser pua alir tanüngba nisungtem chioctsü asoshi tezungzüktep yangluang ta ajungshir, aser pai aibeler tem mapu tashi Israel anisüngzük malitsü ta ashi.

Hamas aser telungpur telok temi October 7 nü Israel amakdang nisung 1,200 shi tepster nisung 250 pua bener aoba sülen Israel-i Gaza amak tenzük. Iba mapang nungi Israel-i nütsüng yongsük million

2.3 aliba Gaza Strip amakdang tesem timba aoyi kumtsüogo aser Palestine nunger 40,738 shi tepsetogo ta Gaza health ministry ajanga ashir. Rara mechii pei ki yutsür tesem balala nung prokshia alirtem tenokdak tesem peria mali aser tepok masüng timtemtar.

Nüburtem ain adokteba mapang Israel indang trades union federation tekolahka Arnon Bar-David-i sorkar dang tezungzüktep ka agitsü asoshi ajungshia Hombarü longkak aittsu ayongzüka liasü.

Israeli Defence Minister Yoav Gallant, shibai Netanyahu den mapang shia mangatettep adoka liasü, paia tezungzüktep agitsü ayongzük aser opposition lenir aser taoba ato kilonser Yair Lapid-ia nüburtem dang Tel Aviv nung longkak aitda adentsü ajungshia liasü.

United States, Qatar aser Egypt linüktemi anir yimjung asoshi ita aika jembiba nung takok monguteti arur. Tila-tanur 640,000 nem polio atema vaccine agütsütsü asoshi Israel aser Hamas nati Gaza nung Deobar nungi Mongulbar tashi anogoshi ghonda ti rara anena atatsü mulungtapa lir.

Russia-i anünglen nungi Kyiv amak

Kyiv, Rongjui/September 2
(Agencies): Russia-i anünglen nungi Hombar anepdang Ukraine yimtiba Kyiv makogo.

Ukraine indang air defence unit temi Hombar anepdang cruise aser ballistic missile aika khdanga liasü, ta yimti military administration-i Telegram messaging app ajanga metedaktsü.

Kasa mapang nung Russia kubok Belgorod tesem ketdangsürtemi ashiba agi, Ukraine-i iba tesem amakba sülen childcare facility ka raksaja liasü.

Ukraine nunger sepaitemi ashiba agi, parnoki Kyiv, Kharkiv, Dnipro, Poltava, Mykolaiv aser Zaporizhzhia yimtitemi missile 35 yokba nungi 22 raksatsü aser drone 23 yokba nungi 20 khadanga liasü.

Missile aser drone tem aika khadangaka yimti nung tesem aika dak kongshiogo aser iba ajanga nüburtem bomb shelter tem nung jenoktsüa aküm.

Kyiv Mayor Vitali Klitschko-i ashiba agi, Holosiivskyi aser Solomianskyi district nati emergency services tem yoka liasü. Shevchenkovskyi district nung nisung ka yirua liasü, ta parnokisa metedaktsü.

"Inyakyim ajak atema telangzüba agütsütsü aser tsükchirtemi aji ajangshitsü," ta tir office tekolahka Andriy Yermak-i yimti amakba sülen Telegram ajanga metedaktsü.

"Inyakyim ajak atema telangzüba agütsütsü aser tsükchirtemi aji ajangshitsü," ta tir office tekolahka Andriy Yermak-i yimti amakba sülen Telegram ajanga metedaktsü.

Kyiv yimti military administration tekolahka Serhiy Popko-i ashiba agi, Ukraine yimtiba dak cruise missile 10 dak tema aser ballistic missile 10 shi khaloktsüba den drone-a ka yoka liasü, koba Ukraine indang air defence-i khadangogo.

Kasa mapang nung Ukraine media sangdong balala ajanga ashiba agi, Kharkiv yimtia missile aser drone amshia makogo. Kharkiv region tekolahka Oleh Syniehubov-i Hombar anepdang ashiba agi, Kharkiv indang Industrial district maka liasü. Anüng ajanga amakba sülen iba tesem nung nisung aliba ki ka raksatsü aser tanga kitem nunga mi adoka liasü.

Ukraine den arrtsü nung aliba Russia yimti Belgorod ketdangsürtemi ashiba agi, Hombarü Ukraine-i childcare facility ka raksatsüba sülen school aika nung online class tem tenzüktsü.

"Belgorod yimti nung kindergarten ka ajunga amai raksatsügo," ta Regional Governor Vyacheslav Gladkov social media nung sangdong ka ajanga metedaktsü.

Summer vacation tembangba sülen school tem Hombarü nungi tenzüktsü liasü.

Maneni Ukraine nunger sepaitemi Kursk tesem makdar aser Russia nunger sepaitemi parnok menokdangteti aradar.

Kasa mapang nung Deobarnü Russia-i Ukraine nung yimti tulutiba rongnung tanabuba Kharkiv amakba sülen tanur pongu densema nisung 47 yirua liasü.

Deobarnü anüng ajanga amakba mapang Kharkiv yimti nung shopping mall ka aser sports centre tontibang ka dak kongshia liasü. Iba yimti ya Russia arrtsü anasa lir.

Mayor Ihor Terekhov-i ashiba agi, Deobarnü Saltivskyi aser Nemyshlianskyi district kubok tesem balala amak. Prosecutor general-i ashiba agi, Russia-i Iskander missile amshia liasü.

Yirurtem rongnung ita asem kinü tanur ka densema tanur tenet yirua liasü.

"Nisung aika temang kanga mejungi yirur lir," ta mayor-i ashiba Ukrainska Pravda-i metedaktsü.

Paisa, tekümzükertem aser ambulance tema maka liasü, ta ashi. "Tsüchirtemi yimti kanga atonga amak aser iba ajanga doctor tema yiruogo," ta Terekhov-i ash.

Yimti nung apartment block ka maka nisung tenet tepsetba den aika yirutsüba sülen Deobarnü ano iba yimti maka liasü.

Deobarnü Kharkiv yimti amakba sülen Ukraine tir Volodymyr Zelenskyy-i ano parnok nem teyari agija aliba linüktem dang Russia amaktsü atema parnok indang hadir sepaitem makogo.

ANNEXURE-I DEEDS FOR GOVERNMENT EMPLOYEE FOR CHANGE OF NAME/ SURNAME AND TRIBE IN THE SERVICE BOOK/PIMS

Regd. No. 149/2024

Date: 20/08/2024

By This Deed I, the undersigned Smti. Rongsenyangla, D/o. Shri. Lanusungkum lately called Smti. Bendangjungla, D/o. Shayimo (former name) employed as Lower Divisional Assistant, under the establishment of District Education Officer, Mokokchung, Nagaland, do hereby:-

Wholly renounce, relinquish and abandon on the use of my former name and Date of Birth of Smti. Bendangjungla, D/o. Shayimo, 09-05-1980 and in place thereof do assume from the date thereof the name and Date of Birth of Smti. Rongsenyangla, D/o. Shri. Lanusungkum, 26-02-1979 and so that I may hereafter be called, known and distinguished not by my former name and Date of Birth of Smti. Bendangjungla, D/o. Shayimo, 09-05-1980 but by my assigned name and Date of Birth of Smti. Rongsenyangla, D/o. Shri. Lanusungkum, 26-02-1979.

For the purpose of evidencing such my determination, declare that I shall at all times hereafter in all records, deeds any writings and in all proceedings, dealings and transactions private as well as public and upon all occasions whatsoever use and sign the name and Date of Birth of Smti. Rongsenyangla, D/o. Shri. Lanusungkum, 26-02-1979 as my name and Date of Birth in place of and in substitution for my former name of Smti. Bendangjungla, D/o. Shayimo, 09-05-1980.

Expressly authorizes and request all persons at all times hereafter to designate and address me by such assumed name and Date of Birth of Smti. Rongsenyangla, D/o. Shri. Lanusungkum, 26-02-1979.

In witness whereof I hereunto subscribed my former and adopted name and Date of Birth of Smti. Bendangjungla, D/o. Shayimo, 09-05-1980 and Smti. Rongsenyangla, D/o. Shri. Lanusungkum, 26-02-1979 affixed my seal on this 5th day of August 2024.

Signed and delivered by the above
Chief Judicial Magistrate, Mokokchung: Nagaland

SANGDONG

India Government aser Federal Govt. Nagaland tsüngda Ceasefire Aggremet koba Nagaland Baptist Churches Council-i anepalua 6th September 1964 nung yanglua tang tashi arudagi. Iba anogo mung bilemteta taküma Ao arogo aser yimtsüng Putu menden ajaki 6th September, anepdang 6:00 AM nungi tenzüka iba yimjung maneni otetsü Tsüngrem dangi sarasadem yokdi ta ayongzüker.

Kuknalim

President
NNC, Ao Region

Raisi mena aliba helicopter ya tzüngsang majungba agi tsükok

Tehran, Rongjui/Sept. 02

(Agencies): Iran indang taoba tir Ebrahim Raisi mena aliba helicopter May ita tsükokba indang bushisüngdangba nung

iba lendong ya tzüngsang majungba nungi ajuru, ta bushisüngdanger temi Deobarnü ashi.

Arishi küm 63 tain Raisi aser pa meina senzürtem mena aliba helicopter ya Iran north tsütsü tzüsü agi nungbunga aliba tenem len tsükoka tir den nisung tenet asü, aser iba yongji Iran nung ajungbena election agitsüsa akum.

Helicopter ya talisa region nung tzüngsang majungba ajanga tsükok, ta iba lendong atalokba indang bushisüngdangba board ajanga ashi.


Supreme Board of General Staff of the Armed Forces ajanga ashiba agi, ajungbena tzüsü kanga melema alongba ajanga helicopter ya tenem nung oa tsükok.

Iran indang army-ia May ita iba ama osang ka sangdongba nung, Iran foreign minister Hossein Amir-Abdollahian densema asüba lendong nungya mapa tamajung inyakba kuli kecha mongutet, ta shia liasü.

August ita Fars news agency-ia May 19 nü iba lendong ya tzüngsang majungba ajanga aser security protocols nung mela aliba dak nungi tali nisung ana mena aliba ajanga helicopter ya azükleni metutet, ta shia liasü.

Ajisüaka Iranian armed forces ajanga iba bushitetba ya magizükterti security protocols anema helicopter nung nisung ana tali mena liasü ta Fars news ajanga ashiba ya khenyongi tai, ta shia liasü.

BC Jindal Group-i ISL team Hyderabad FC alizükogo



Rongjui/September 2, 2024

(Agencies): BC Jindal Group-i sangdong ka ajanga, taoba mapang Indian Super League (ISL) champions Hyderabad FC alizükba sangdongogo.

Iba osang sangdongba ajanga BC Jindal Group tang mezüngbuba Indian sports ecosystem nung tetsüng ajemokba sayur. Hombarnü

sangdong ka ajanga iba industrial conglomerate yagi ashiba agi, "India nung sports jenjang ajungkettsü aser India nunger lanur asayartem international jenjang nung tokteptettsü sabang tajung agütsüba dak rangloker onok inyaktsü."

Hyderabad FC shirnok dang Nawabs ta ajar, parnok tang 2024-25 ISL season atema renemshiba mapang ka lir.

2024-25 ISL season nung parnok mezüngbuba asaya September 19 nü Bengaluru FC den away game ka asaya tenzüktsü.

ISL ya taküm agi 11benbuba asayatsü lir aser iba asayamung ya India nung football asaya tetoktepba ajak rongnung tematiba lir, koba India nunger football asaya international jenjang tonga ajungkettsü atema

bendanga agütsür inyakdar.

Hyderabad FC ya August 27, 2019 küm tentet, aser 2021-22 season nung parnoki Kerala Blasters madak takok ngua ISL title bera liasü.

Hyderabad FC pur parnok indang home game tem ajak Hyderabad tezülen Gachibowli nung amendaker aliba M.C Balayogi Athletic Stadium nung asayar.

"Linük nung nütsüngyongstük billion 1.4 lir aser India ya world of football nung sleeping giant ka lir. India nung football asaya tetsükdaktsü ajangshibatem bushiteta bentettsü merangtsü atema onoki Hyderabad FC alizükba iba asaya nung tetsüng ajemokogo. Onok nükjidongji linük nungi lanur asayartem anitettsü asoshi lir," ta Hyderabad FC otongdar kati ashi.


Bravo CPL nung taküm tatembangbuba asayatsü

Rongjui/September 2, 2024

(Agencies): Dwayne Bravo, shiba IPL nung CSK nungi nüngtugu asayar ka liasü, pai pa Caribbean Premier League (CPL) nung taküm tatembangbuba asayatsü ta sangdongogo.

All-rounder shibai CPL tenzükba mapang nungi tongibang shilem agia aruogo, pa taküm iba asayamung nung tatembangbuba asayatsü.

Bravo-i CPL nung kanga junga asayaogo aser pa iba asayamung nung wicket timtiba pongu benogo, aser pa ya iba agiba asayar lir aser pa lenisüba



nung par team-i iba asayamung asemen tashi kokogo. CPL nung Bravo-i ajak sentepe title pongu benogo, aser pa ya iba asayamung nung asayar

tajungtiba rongnung ka ta züngshir.

"Jangradema asayaogo aser Caribbean nunger matsüngdang ni tatembangbuba professional asayamung asayatsü yongya atar. TKR nung ajak tenzük aser ni kū team den asaya-a asaya nungi anentsü," ta Bravo-i ashi.

CPL nung asayaba mapang Bravo-i asaya 103 nung run 1155 yangluogo aser wicket 128 agir lir. Arishi küm 40buba nunga pai team nem teyari agütsüdar aser taküma pai tongibang shilem agitsü imlar.

dena amenoktsü.

Battle of the Leagues ya team asayaba tetoktepba ka lir, koba amateur asayartem atema yanglutsüba lir aser iba asayamung partner tem rongnung Dynamic Universal Pickleball Rating (DUPR), Minor League Pickleball, Pickleball United, FansPlay, the Indian Pickleball Association, Asian Pickleball Association, aser Global Pickleball Federation densema lir.

Battle of the Leagues kübok category ajak nung takok anguba team USA nung DUPR Nationals nung asayatsü atema maongka angutsü aser iba asayamung atema asayartem senzüsenpong aser tatendak atema PWR-i senotsü teyari agütsü. Iba asayamung nung ajak sentepe senpet USD 50,000 agütsü.

PWR, PWR World Series (PWS), aser PWR World Tour ya tawa Dubai nung amenoka liasü aser GCC region-i, PWR World Series mezüngbuba 2025 küm February ita ayongzüka asayatsü ta sangdongogo.

Pickleball asaya ajungkettsü atema Agassi-i India semdangtsü



Rongjui/September 2, 2024

(Agencies): Taoba mapang World No 1 tennis asayar aser Grand Slam ti tashi koker alisang Andre Agassi-i, PWR DUPR Indian Tour aser League lapoktsütsü atema taruba küm January ita India semdangtsü.

Iba asayamung ya linük nung pickleball asaya ajungkettsü nükjidong nung ayongzükogo.

Agassi asaya aliba mapang pai Australian Open pezü, French Open aser Wimbledon kaka aser US Open ana tashi koka liasü aser iba den pai 1996 Atlanta Olympics nunga gold medal ka nguogo.

Pickleball World Rankings (PWR)-i rankings structure tasen ka benokba sülen tang PWR DUPR Indian Tour aser League ayongzüka asayatsü lir. Iba den külemi PWR World Tour aser PWR World Series

ngua asayatsü imlar," ta Agassi-i Video osang ka ajanga metedaktsü.

Agassi asaya aliba mapang pai Australian Open pezü, French Open aser Wimbledon kaka aser US Open ana tashi koka liasü aser iba den pai 1996 Atlanta Olympics nunga gold medal ka nguogo.

PWR, PWR World Series (PWS), aser PWR World Tour ya tawa Dubai nung amenoka liasü aser GCC region-i, PWR World Series mezüngbuba 2025 küm February ita ayongzüka asayatsü ta sangdongogo.

Paris Paralympics: Yogesh Kathuniya-i silver medal angu



Rongjui/September 2, 2024

(Agencies): Tang asaya aliba Paris Paralympics 2024 nung India nunger asayar Yogesh Kathuniya-i, men's discus throw F56 event nung silver medal ka nguogo.

Iba medal anguba sülen Yogesh-i Paralympics ana atonga silver medal nguogo.

nung sepai ka lir, pa dak arishi küm 9 asüba mapang Guillain-Barré syndrome puteta liasü.

Pa Indian Army Public School, Chandigarh nung azüng kong tebu Chandimandir Cantonment nung inyaka liasü. Iba sülen pa Delhi nung Kirori Mal College nung azüng aser idaknungjiagi Bachelor's degree in Commerce angu aser para games nung dena liasü.

Kathuniya, 2020 Summer Paralympics nung men's discus throw F56 event atema qualify süa liasü. Iba asaya nung pai discuss 44.38 m merepa silver medal ka nguogo liasü.

Paralympics nung takok tajung anguba atema pa nem India tir Ram Nath Kovind-i 2021 küm November ita Arjuna Award agüja liasü.

Kirori Mal College nung students' union General Secretary Sachin Yadav-i ajungmesoba sülen pa 2016 küm nungi para sports asaya tenzük. 2018 küm pai Berlin nung World Para Athletics European Championships nung discuss 45.18 merepa world record ka yangluo liasü.

US Open: Zheng Qinwen quarterfinal-i iogo

Rongjui/September 2, 2024

(Agencies): Hombarnü US Open tetsür kija asaya nung China tsür Zheng Qinwen-i ghonda 2 ser minute 50 asayaba sülen Croatia tsür Donna Vekic set asem nung kokogo.

Arishi küm 21 tain Zheng ya China tsürtem rongnungi US Open quarter-finals anaben tashi atongba asayar tanabula lir. Li Na-i 2009 aser 2013 küm US Open quarter-finals tonga liasü.

Zheng taruba asaya number two Aryna Sabalenka den asayatsü, shibai 2023 küm kasa asayamung nung la tsükdaktsü aser taküm January ita Australian Open nunga tsükdakja liasü.

Zheng-i mezüngbuba set nungbo serve ka danga break mesüdaktsü Vekic akok, saka tanabuba set nung Croatia tsürla yagi kanga junga asaya takok angu.

Ajisüaka tasembuba round nung Zheng-i kanga tashi ita asaya aser asaya koka taruba round atema jenjang ngutetogo.

BILEMDANGANG

"Tangari na sentoka metoktsütettsüsa tajung inyakang."